

E no ta di acuerdo cu sentencia di Corte den Prome Instancia

12 luna di prizon exige pa homber cu a tene relacion cu mucha muhe di 12 aña

ORANJESTAD – Ministerio Publico no a keda satisfecho cu e decision di Hues di Corte den Prome Instancia contra e homber G.Q., cu a admiti di tabatin relacion cu un mucha muhe di 12 aña. Fiscal a exige 12 luna di prizon y Hues, teniendo tur circunstancianan na cuenta a condena G.Q. na un castigo combina y 120 ora di trabou.

Procurador General interino (PG) a bisa Hof cu G.Q. ta wordo acusa cu entre 15 di Augustus 2008 te 15 di Augustus 2010, el a tene relacion sexual cu un mucha muhe di 12 aña. PG a bisa Hof cu e motibo cu a apela ta pasobra cu ta haya e castigo demasiado abou.

SOSPECHOSO TA ADMITI

Presidente di Hof a bisa cu e lo bay repasa e caso y cu G.Q. a admiti di tabatin relacion cu e mucha cu tabata su bisña. E tempo ey e acusado tabatin 20 aña y e mucha 12 aña. Segun e acusado e mucha, kende el a kere tabata un teenager, a bis'e cu e tabatin 16 aña y despues di casi 1 aña di tabatin relacion, el a bin haya sa cu no ta asina. Hof a remarca cu G.Q. a declara otro cos na KZP. Hof a mostra cu G.Q. a declara na KZP cu e lo a ricibi un carta di e dama hoben cu e tin 15 aña y cu e aña ey mes e lo bira 16 aña. G.Q. lo a bis'e cu e no kier tin nada cun'e pasobra e lo por bay cera. Hof a bisa cu aki claramente ta mostra cu for di un principio G.Q. tabata sa cu e hoben tabata menor di edad y a mostra tambe cu ta di dos biaha cu G.Q. tabatin relacion cu e mucha, ora e mucha a bis'e cu e tabatin 13 aña. G.Q. a bisa Hof cu e no ta corda di e caso pasobra e kier laga esey pa pasado riba cual Hof a bis'e cu e mester haci esfuerso pa su mesun bon y tambe pa tin claridad den e caso.

MUCHA TABATA INSISTI PA RELACION

Hof a puntra e acusado si e no tabata sinti fastioso cu e tabatin relacion cu un hoben di 13 aña riba cual G.Q. no a contesta. Hof a mostra cu ta e mayornan di e mucha a haci denuncia, despues cu e mucha a dicidi di conta nan pasobra e no kier tin un relacion scondi. Hof a puntra e acusado si e relacion a tuma luga durante henter e periodo menciona den e acusacion. Segun G.Q. no tabata asina y cu e tabata papia hopi cu e mucha. Segun G.Q., el a purba aleha pero e mucha tabata bolbe acerke y tabata insisti pa nan tin relacion. E acusado a bisa Hof, cu nan tabatin relacion sexual cu otro pero no frecuente. Hof a remarca cu segun e mucha, algun siman prome cu el a haci denuncia, nan tabatin relacion sexual. Segun G.Q. e kier a caba cu e relacion y a busca un otro amiga pero e mucha a bis'e cu e lo bay bisa su mayornan pasobra e tabata cansa cu e cosnan tabata sosode scondi. Den Corte, G.Q. a splica Hof cu actualmente e ta casa y tin dos yiu y tin un trabao.

EXIGENCIA DI PG

PG interino ta haya legalmente proba cu G.Q. tabatin relacion sexual cu un mucha cu no tabatin 16 aña. PG a bisa cu e ley penal ta pa proteha damanan hoben contra abuso y tambe proteha nan mes. Hobenan kier bay experimenta cu sex, bebida alcoholico. PG ta haya cu Hues den su sentencia a mostra tambe riba e puntonan aki pero e no ta di acuerdo cu castigo. Fiscal a exige 12 luna di prizon y a mostra cu e diferencia di aña entre e sospechoso y victima tabata 9 aña y no tabatin un relacion constante. Tabatin un relacion scondi. Segun PG, tur cos a cuminsa tempo e mucha tabatin 12 aña. Na opinion di PG, apesar cu

e mucha a cuminsa cu tur cos, cu esaki no ta cambia e delito y cu G.Q. como un adulto hoben no a evita pero a sigui.

El a exige 12 luna di prizon di acuerdo cu e exigencia di Fiscal den Corte den Prome Instancia. PG ta haya cu mester manda un señal bon cla na comunidad cu no ta tolera lamentabel casonan asina.

ABOGADO

Mr. Chris Lejuez ta haya cu Hues di Corte den Prome Instancia a tuma debido cuenta cu tur e facetanan di e caso. Segun e abogado, Hues den su evaluacion a bisa bon cla cu a tene cuenta cu e mucha tabata menor di edad y cu e mucha tabata persisti riba e relacion. E mucha tabata insisti pa tin relacion y tabata presiona G.Q. pa sigui tin relacion cun'e. Hues a tene cuenta cu G.Q. a purba di aleha di e relacion, pero riba e persistencia di e mucha el a bolbe cay den relacion cun'e. E abogado a sigui bisa cu Hues tambe a tene cuenta cu G.Q. tabata un hoben adulto y no tabata mira su responsabilidad pa aleha di e malo manera un adulto maduro lo mester haci. G.Q. a admiti di a haci malo y no ta biba mas den bisindario di e dama hoben aki. Actualmente e ta casa y su señora ta na altura di e situacion y ta apoya G.Q.

E abogado a bisa Hof cu ta G.Q. ta mantene su famia. E tin un trabou y si e wordo condena e lo perde su trabao. El a bisa cu si condena G.Q. di acuerdo cu Fiscal, no ta castiga solamente e acusado sino su famia completo. El a propone pa si acaso Hof ta haya cu mester impone mas castigo, impone mas ora di servicio comunitario. Hof a cera tratamento di e caso y a bisa cu dia 10 December pa 2'or di merdia lo tin sentencia. □